



Gratuziuns vindaivlas per ils novs parsuras dal parlament federal: dretg il president dal cussegl naziunal Ruedi Lustenberger e san. il parsura dal cussegl dals chantuns Hannes Germann.

KEYSTONE

In scrinari e catschadur è il pli aut Svizzer

■ **(anr/vi) Ruedi Lustenberger presidi-scha dapi ier il cussegl naziunal. Il politicher da la pcd lucernais è vegnì elegì cun 175 da 183 vuschs valaivlas.** «Jau sun da l'Entlebuch, hai fatg in emprendisadi da scrinari ed hai manà 37 onns mia atgna interpresa. Ch'ins ma surdat il presidi dal cussegl naziunal, na sa chapescha per mai betg da sez. Quai è mes pli grond success», di Lustenberger. Per sa preparar sin ses onn presidial ha el aposta fatg curs intensivs da franzos a Strassburg ed ad Avignon.

Il bab da tschintg affons sesa dapi 14 onns en il cussegl naziunal e s'engascha en las associaziuns da scrinaris e mastergnants. El è daventà enconuschent sco

president da la cumissiun da gestiun durant l'affera Hildebrand. Ils ultims onns ha Lustenberger politisà a favur d'energias regenerablas e per abandonar l'energia atomara.

Ses temp liber passenta el il pli gugent en sia hetta da chatscha, nua che ses collega-chatschadurs, purs e mastergners, mettian el savens sin punt, sch'insatge na marschia betg endretg a Berna.

Sco emprim vicepresidente ha il cussegl naziunal elegì *Stéphane Rossini* (sp/VS) e sco segunda vicepresidente *Christa Markwalder* (pld/BE). Il cussegl dals chantuns ha tschernì *Hannes Germann* (pps/SH) sco president e sco vicepresidents *Claude Hêche* (sp/JU) e *Raphaël Comte* (pld/NE).